



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8


Yangia anidakangma :

Tir Yimiyim

tiryimiyim@aolima

tir yimiyim

TAPAK 3



Coronavirus poktetba tanaben bushiang: Biden



Assam Assembly speaker Daimary-i tatok meshi

VOL. XVIII NO. 223 (ADOK 223) DIMAPUR

ROGONÜ (FRIDAY)

MONUPII (MAY) 28, 2021

₹ 5.00

GHC Kohima Bench-i state sorkar dang COVID-19 atema tuluba inyaksü tuyur

Kohima, May 27, 2021 (TYO): Gauhati High Court (GHC) Kohima Bench-i Nagaland state sorkar nem tetuyuba kar agütsüogo.

GHC Kohima Bench-i isolation centre shimtsü, testing inyakyim ulushitsü, COVID-19 angati tendangtsü, vaccine agütsüba maparen tuluba inyaksü, health facility tem nung nübo peria lezmüksütsü aser mang endokba nung sen onsara agiba aziüksü atema sorkar dang ashi.

May 5, 2021 nü Public Interest Litigation (PIL) ka benokba angadandang Justice Songkhupchung Serto aser Justice S. Hukato Swu nati state sorkar nem iba tetuyuba agüja liasü.

State sorkari item tetuyuba inyaksü aser June 10, 2021 nü maneni iba ken o angadangtsü, ta tenatisa metetdaksü.

"Yaküm COVID-19 wara agi atongdang state sorkari quarantine center tem lapok aser yimtsüngtem nunga ibala mesükba centre tem lapoka liasü, saka takümbo item centre lapoka mali. COVID-19 aliba

puteterem home isolation dang südaksür," ta okadaki ashi.

"Nübertem indang rongsenkettsüng jenjang reprangdangra, takartemi dang home isolation süteter. Anungji nisung ka dang home isolation asütsü tetuyuba magütsüdang sorkari tentetba Surveillance team temi iba kibong nung takdang peria ali mali ta asüba metettsüla aser iba sülen jiang home isolation asütsü ashitsüla" ta okadakis metetdaksü.

Nisung ka home isolation nung ayudang Surveillance team-i kishi nung notice ka yutsütsüla aser iba kibong nungi züngsem shinga kimai madokdaksütsüla, ta parnokisa ashi.

COVID-19 puteter kar home quarantine mesütettsü ta Surveillance team-i bushitetra state sorkari parnok amongtsü atema tesem lapoktsüla, ta oadkakis ashi.

GHC Kohima bench-isa state sorkar dang Village Council/ Arogotem, Civil Society teloktem aser jila nung ward ketdangsurtem shilem agidakja isolation centre lapoktsü ashi.

Maneni, chiyungtsü atema sorkari Village Council, NGOs aser arogotem den asüngdangtepa lenmangtem bushiteptsüla, ta parnokisa shisem.

Iba ken o angadandang sorkar tenung nung Department of Health and Family Welfare, ketdangsur N Mozhui-i ashiba agi "pei sasa COVID-19 tendangtsü molungteter dang nungi dang sen agir. Tesem ajungalen tapi agi tendangba mapa inyakdar aser iba atema sen kecha magir."

"Wara anema rara nung nisung ajak tendangtsüba kanga tongtipang lir. Nisungtem dak metendangra, asenoki parnok dak virus aliba mesüra maliba memetettsü. Virus alir tekaraba nung putetba ajanga dang virus belenshiba noktangtettsü. Nagaland nung yimtsüngtem nunga virus belenshir, anungji pei sasa tendangtsü molungteter danga sen magütsüla" ta GHC Kohima bench-i ashi.

Nagaland nung anogo shia sample tendangba ya kanga dang ajema lir, anungji timba tendangtsüla, ta parnokisa ashi.

Iba dak sendakba nung High

Court-i HFW Department aser State sorkar dang testing facility timba akümtsü aser PHCs o CHCs nunga tendangtsü tetuyuba agütsü.

"Dimapur, Kohima aser Tuensang nung dang RT-PCR testing facility lapoka lir. Anungji tanga tongtipang tesemtem nunga lapoktsü lenmang bushitsüla. Ajisüaka, PHCs aser CHCs nungbo True Nat mesüra Rapid Antigen Test ajanga tendangtsüla" ta okadaki metetdaksü.

COVID-19 indang vaccine agütsüba atema jembidang okadaki State sorkari mapa inyakba atema pelaba metetdaksü aser tekaratiba nung vaccine angütsü atema inyaksü ayongzük.

Arishi küm 18 nungi 44 tsüngda alirtem nem vaccine agütsüba anogo ya timba akümtsüla, ta GHC Kohima bench-isa metetdaksü.

Tang ya Nagaland nung arishi küm 18 nungi 44 tsüngda alirtem nem hopta nung anogo ananü- Hombar aser Mongulbar nung vaccine agütsür.

Nisungtemi vaccine agütsü

nungnangba atema GHC Khimba Bench-isa state sorkari dang Doordarshan, All India Radio aser tanga print o digital medias ajanga osang prokshitsü tetuyuba agütsü.

Kanga taintem aser temang nung timtem alirtem tonga oa vaccine agütsütsü atema state sorkari inyakyim tenzüksüla ta parnokisa metetdaksü.

High Court Bench-i shimba Amicus Curiae Taka Masa-i district shia nung Chief Medical Officer (CMO) dang PHCs, CHCs aser district hospitals nung mapa inyaksü nübo aliba osang tejangja meshi.

Covid-19 ajanga shiranga asürtem mang aremstü atema sen kanga agiba atema GHC Kohima Bench-i state sorkar dang jenjang reprangshimtsü tetuyuba agütsü.

"Asenoki ya tensa tamajung ka nung lir anungji state sorkari sensakertem yaritsü imlar" ta okadaki ashi.

Iba PIL ya June 10, 2021 nü ano angadangtsü aser iba nung Ministry of Health and Family Welfare adentsüla ta GHC Kohima Bench-isa metetdaksü

Kohima DTF-i Sechu-Zubza Covid Care facility tem semdang

Dimapur, May 27, 2021 (TYO): May 27, 2021 nü Kohima atema Minister in-charge Tongpang Ozukum-i anir Kohima District Task Force (DTF)-i Sechu Zubza semdang.

Sechu-Zubza Sub-Divisional Block Level Task Force-i Covid Care Centre (CCC) lapokba atema Minister Tongpang-i pelaba metetdaksü.

Don Bosco School ketdangpurtemi Western Angami nung alirtem atema school building nung Covid Care Centre (CCC) lapoktsü agütsüba atema sorkar aser Kohima DTF tenung nungsa pai pelaba ashi.

Minister Tongpang-isa Sechu-Zubza Sub-Divisional Block Level Task Force dang Don Bosco CCC aser Sechu Government High School nung quarantine center tekaratiba nung lapoktsü atema mapa inyaksü tetuyuba agütsü.

Power department-i Covid Hospital aser Covid Care Center ajak nem power supply shitak agütsütsü lemteba atema paisa pelaba shisem. CMO Kohima Dr. Vezokholu

Theyo aser lai aniba teloki mezüng anogo nungi kanga dang bendanga agüja mapa inyaka aruba atema Minister Tongpang-i tenüngsang agütsü.

Western Angami Public Organization-i anir Western Angami tesem nung civil society teloktem aser arogotemi amalitepa yaritepba atema paisa pelaba ashi aser maneni yariteptsü mepishi.

Advisor Medo Yhokha-ia Don Bosco School authority, WAPO aser nisungtem dang pelaba metetdaksü.

"Akokba tashi Community covid care center yaritsü aser DPDB Common Pool kübok senotsü lezmükba ama amshitsü" ta Medo-isa ashi.

Tanü Advisor Dr. Nicky Kire; Advisor Medo Yhokha; MLA K. Nakro; Dr. Vezokholu Theyo, CMO Kohima; Khreingulie Kuotsu, Sechu Zubza Village council chairman aser district administration ketdangsurtemi Minister Tongpang meina liasü.

COVID-19 Nagaland: Total lockdown süaka COVID-19 mazüokteter Nisung 21,000 adenogo- 228 dak putet, 195 taneptsü angu & 11 asü

Kohima, May 27, 2021 (TYO): Nagaland nung anogo 13 buba total lockdown liaka, anogoshia nisung aika dak COVID-19 aketba puteta arur aser Brihostibarnü 21,000 adenogo.

"Tanü nisung 228 dak COVID-19 aliba putet aser parnok züngsema nisung ajak agi 21,023 kümogo" ta Health & Family Welfare Minister, S Pangnyu Phom-i ashi.

May 14, 2021 aonung 6:00 ako nungi Nagaland sorkari Covid-19 aziüksü atema total lockdown benoka liasü. Iba anogo tashi nung nisung 17,531 dak puteter liasü saka lockdown mapang nisung 3,492 dak putetba züngsema 21,023 kümogo.

"Tanü COVID-19

puteteremji Dimapur nung 98, Kohima nung 54, Mokokchung nung 25, Tuensang nung 20, Phek nung 15, Zunheboto nung 6, Wokha nung 4, Longleng o Mon nung anana (2) aser Kiphire o Peren nung kaka (1) lir" ta Minister Pangnyu-i ashi.

"Nisung 21,023 rongnungi 15,124 taneptsü nguogo aser tang nisung 4,941 anepaludar. Nagaland nung COVID-19 nungi taneptsü angubaji 71.94% lir" ta paisa ashi.

Tanü COVID-19 puteta alir nisung 11 asüba züngsema tasür ajak agi 338 kümogo, saka iba nungi nisung 12 bo tanga timtem ajanga asü, ta Minster Pangnyu-isa shisem.

Nagaland nung COVID-19

puteter nisung 620 tashi tanga state temi ogo.

"Bodbar tashi nung Nagaland nung nisung 2,12,759 nem COVID-19 vaccine indang dose 2,66,792 agütsüogo" ta State Immunization Officer Dr Ritu Thurr-ia metetdaksü.

Vaccine agirtemji frontline workers 57,469, healthcare workers 15,398, arishi küm 45 ser temapur 1,21,295 aser arishi küm 18 nungi 44 tsüngda alir 18,597 lir, ta paisa ashi.

"Vaccine agirtem rongnung nisung 54,033-i dose anaprong agiogo. Parnokji frontline workers 27,925, healthcare workers 10,175 aser arishi küm 45 ser temapur 15,933 lir" ta Dr Thurr-isa metetdaksü.

NCD-i LBCD aser DMC dang pelar

Dimapur, May 27 (TYO): Naga Cemetery, Zani village area nung Covid-19 agi asür sensaker 20 aremba nung yariteptsü ta Lotha Baptist Church Dimapur-i molungsoa tenlaba atema kanga pelar, ta Naga Council Dimapur (NCD)-i metetdaksü.

Külen, Administrator DMC Albert Ezung-i anir par staff-i May 26, 2021 nü New Naga Cemetery mozü agi merüktettsüba atema

tenüngsang agütsür, ta NCD General secretary, Thspongkyu Sangtam-i ashi.

"Iba inyakyim ajanga COVID-19 menatepba aziüksü imlar aser DMC-i maneni hopta nung khenbosa iba mapa tajung inyaksü mepishir" ta paisa metetdaksü.

Sensaker kibong nungi COVID-19 ajanga asüba atema burial registration fee magütsü NCD-i telemteba agiogo, ta Thspongkyu-isa ashi.

NFHRCC-i Er. Howoto Chishi mang ayimer

Dimapur, May 27 (TYO): Brihostibarnep PWD(R&B) Dimapur Division nung Er. Howoto Chishi asüba osang angashia kanga aoksar, ta NFHRCC-i metetdaksü.

"2013 küm nungi Foothills road tenzüka nung pai shilem tulu agia arur aser talisa Governor's camp, Liphanyan

nung Doyang apu yangluba nung pai kanga dang bendanga agüja inyakogo. Iba mapa tajung ya putiotsü nung zülüoka ayutsü. Er. Howoto Chishi asüba ya NFHRCC atema takoksa tulu lir aser Naga nungeri ketdangsur tajung ka akoksaogo" ta NFHRCC Convenor, Supu Jamir aser General Secretary W.

Leмба Chang nati sangdong ka nung ashi.

"Onoki asüri toktsür aoba kibong den asükhu lemsateper aser Tsüngremi parnok nem tesünep agüjang ta sarasademsür. Maneni, asür tanüla teti anisüngzük ngudakangma" ta NFHRCC ketdangpurtemisa ashi.

Covid-19 tashidak nokdangtsü atema senso shia teinyaksü asem :



Tir Yimiyim

Tangar alidak teti teni tebang nembanga mask temerük agiang;



Tangar den tsüktepa tenokdak aser temen;



Teti sapon agi teka metsükang.



Nüburtemi sorkar totuyuba sülen anidaktsüla: OKM



Dimapur, Monupii/May 27 (TYO): District nung COVID-19 cases tali akumba asoshi district administration renemshia aliba tali tejangiaba metetjemtsü aser sensaksemtsü atema Ongpangkong Kaketshir Mungdang (OKM) ketdangpurtemi May 26 & 27, 2021 anogotem Deputy Commissioner, Mokokchung aser Chief Medical Officer Mokokchung ajurua liasü.

Tir Limatongzuk Jamir-i anir OKM ketdangpurtemi Deputy Commissioner Limawabang Jamir aser CMO Dr. R. Chubala Aier ajurua liasü.

Iba mapang district ketdangsürtemi COVID-19

hospital Mokokchung nung Oxygen Generation Plant inokba maparen tembangogo aser department ajanga tekeratiba nung oxygen tank tem yipten nung inoktsütsü, ta OKM ketdangpur dang ashi.

Mokokchung nung shirangertem anepalutsü atema May 27, 2021 nü nungi tenzüka Merepkong nung COVID Care Centre ka amenok tenzüksü, ta ketdangsürisa metetdaksü.

Manei COVID-19 hospital nung yipten 50 aser ventilator pezü lir, ta metetdakja liasü.

Deputy Commissioner aser Chief Medical Officer den senden amenba mapang district nung TrueNat machine ka aser

portable X-ray machine ka kanga nungdaker ta ajiteta OKM-i sorkar dang tekeratiba nung item oset anepalutsütsü ajungshia liasü.

District administration aser frontline worker temi anibelem mesasai bendanga agütsür nüburtem kumzüka ayutsü asoshi inyakba atema pelar aser sorkari SOP aser danga ozüng balala benokba nung nübur ajungai anidaktsü mepishir, ta OKM sangdong ka ajanga ashi.

Asenok ajak tensa tamajung ka nung lir aser iba tongpang raratsü atema asenok ajak lungjemer nokdaksü nungdaker, ta sangdong ajangasa ashi.

Kohima nung Axis Bank branch kar ghonda 48 shibangtsür

Dimapur, Monupii/May 27 (TYO): Deputy Commissioner aser Chairman DTF Kohima Gregory Thejawelie NCS-i, sangdong ka ajanga Axis Bank branch kar May 27 nü nungi ghonda 48 atema shibanga toktsüba sangdongogo. Bank nung inyaker kar dak COVID-19 tashidak potetba sülen tashidak menatepyonga aoba nokdangtsü atema Ministry of

Health & Family Welfare, Directorate General of Health Services (EMR Division), Govt. of India-i tetuyuba balala agütsür aliba dak ajemdaker iba jenjang agiogo.

Axis Bank branch tem yamai alitsü:

1. Axis Bank, Kohima Branch, UT Complex, Opposite Union Baptist Church, Kohima

2. Axis Bank, PR Hill Branch, Belho Complex, near Red Cross Building, Kohima
3. Axis Bank, GHS Road Branch, High School Road, Kohima

Item bank tem ajak Honibarnü; May 29 tashi shibanga ayutsü aser iba mapang ki merektetba den contact tracing inyakyim benoka inyaksü, ta kasa sangdong ajanga metetdaksü.

LPG den tzü meyoktepba ya nübur mezüngmeshiba lir: NVCO

Dimapur, Monupii/May 27 (TYO): Liquefied Petroleum Gas (LPG) den tzü shilem 70 meyoktepba ya mapa kangasa tamajung aser state yimtiba nung consumer atema mezüngmeshi ulura lir, ta Nagaland Voluntary Consumers' Organisation (NVCO) ajanga sangdong ka nung ashi.

Linük nung danga state aser yimtittem nung kodanga mamshiba mapa tamajung kechiba Nagaland nungbo amshir, ta NVCO ajanga state sorkar dang asüngdang aser tashidak wara agi timtem jenti agütsüba mapang nübur nem tali timtem agüja tang Kohima nung LPG ashikülak mapa inyakba ya kanga retreta agitsü ayongzük.

Officers' Hill Colony, Kohima nung aliba lenirtemi tepang agi NVCO dang osang sangoktsü aser iba mapangjibo tejashi nung agütsür nem osang agütsür liasü, saka LPG ketdangsürtemi consumer nem temolung süa telangzüba magütsü aser bottling plants nungi refill sür aruba nung parnoki inyaksü kecha mali, ta telangzüba angu.

Parnoki cylinder magütsü tsüngta seret odanga leakage reprangba dak alaka parnok dak tashi mali, ta langzüa liasü aser tejashi nung aliba consumer dang tzü inoka aliba LPG ya melentsü atema bener arutsü shia liasü.

Aser iba dak sendakba nung M/S. Seyie Gas Service kiburi Kohima South Police Station nung FIR ka benoka tzü inoka aliba LPG cylinder 39 ya Assam nung aliba Gopanari LPG Bottling

Plant ajanga April 6, 2021 nü Seyie Gas Service tongtsü, ta ashi.

Officers' Hill Colony, Kohima nung aliba tekumdang consumer temi cylinder 18 nung tzü shilem 70 shi LPG den meyokteper aliba putetba atema NVCO ajanga tenüngsang agütsür. Tanüngba cylinder meshidak 21 ya May 24, 2021 nü jangjateta liasü.

Bushisüngdang temi iba mapa tamajung kanga junga bushisüngdangtsüla aser service agütsür aser Indian Oil Corporation-ia ajem ajema makazüi pei khuret amai inyaksüla, ta sangdong ajanga ashi.

NVCO ajangasa Nagaland kübok danga district nung aliba consumer danga kumdanga alitsü ayongzük aser tzü inoka aliba LPG cylinder, tuozük shidak masüba mesüra black-marketing amala nungi jenbua alitsü metetdaksü.

Tanü National Food Security Act kübok jang-o-tzü lema agütsüba nunga tim masüba mapa tali inyaker asünung consumer tem tali saksalema alitsü nungdaker, ta ashi.

Consumer temi timtem balala ajuruba nung temeden bushia teyari agitsü aser osangtsüsang agiteptsü asoshi Tool Free telephone No. 1800 - 345 - 3701 ajanga State Consumer Helpline den jembitsü akok.

Nagaland State Consumer Helpline ya D-Block, Kohima, Nagaland nung amenoka lir aser state kübok district balala nungi teyari balala bushia jembir, ta sangdong ajangasa ashi.

Dimapur Police temi süngdong tema amung

PLANTATION DRIVE
Zone 2, 2021
Dimapur Commissionerate

Dimapur, Monupii/May 27 (TYO): Police Reserve/ Family Line/ Police Stations aser ano danga tesemtem nung Commissioner of Police, Dimapur, Rothihu Tetseo, IPS lenisüba nung Officer aser staff temi süngdong tema liasü. Iba sentong ya 'Plant a tree for free oxygen' omen nung ajemdaker agia liasü.

Iba sentong ya Police Headquarter Kohima tawabangba kübok State Forest Department den lungjemer agia liasü.

DIMAPUR AREA AO BAPTIST CHURCHES & AO CIVIL SOCIETIES
Date : 24th May, 2021.

COVID-19 TONGPANG NUNG SHILEM AGITSÜ AYONGZÜKER :

Yaküm 2020 küm Covid-19 tashidak wara asen lima tashi tonga arur nübertem tetsüba aser shisabolu nung alidang arogo, lokti tentet aser kija kibong aikati mulungsua tenla tulu agütsüba ajanga Dimapur Area Ao Baptist Churches & Ao Civil Societies longjemer Dimapur nung Quarantine Centre asem tashi lapoker, Tsüngrem taochi agi kanga takok ngua anepalutetogo. Iba Quarantine Center asem tashi nung anogo 20 nü tashi nisung 245 nungdak ajak peria agüja anepalur külenang, ano, sen aika anüngba agi Covid wara nokdangba tongpang asoshisa amshitsü atema Dimapur District Hospital (Covid Hospital) nung Multi Public Utility Center ka sen lakh ter agi renemtsüogo. Iba kiji tang Covid Vaccination center kümer amshidagi.

Idakji asenok tenla aser sarasadem manener, kechiyong takumbo ano yaküm dang nungi tesashiba Covid wara agi asenok menepogo. Iba tongpang nung ya Health Worker-tem den asenok senso shiai pei akok shilem agitsü tensa mapang agi akanger. Atangji, kija, kibong, arogo aser lokti tentet aikati iba tongpang nung shilem agi tenzükogo. Item teyaritem ajanga tang tashi nung Covid mozü kitem nung chiyongtsü nungi tenzükur Oxygen concentrators, cylinders, regulators, PPEs aser tasü mang atema süngden tashi tenla agütsüba angur.

Ano, item nungdak ajak dakji alaka, tang asenok ajaki kanga bendanga agüja inyaksüba rongdak nungdak mapa kaji, Covid Hospital-tem nung inyaker, Health Worker-tem temang aser tanüla nungdak ajak agüja iba tongpang tesashi nung tashi aser tasü itta nokdaktetsüsa yaritsübaji lir, kechiyong mozü kidang nungdak osettem aser oxygen ajak peria aliyonga, asenoki inyakertemji junga anepalu mesütetra mozü ki ajak shibanga ayutsüsa akümtsü. Tang asenok ajak atema tebilemstü tulutibaji aji lir.

Iba tebilemstü aser rongdak nungdakji reprangteta, Dimapur Area Ao Baptist Churches & Civil Societies ajanga Dimapur district nung aliba Covid Hospital-tem nung inyaker Frontline Worker-tem nem tekaratiba nung chiyongtsü agüja anepalutsü telemtetba agiogo. Anungji, ano maneni kija kibong, arogo aser lokti tentetemi iba sentong takok ngua inyaktetsü asoshi mulungsua rongsen tenla agütsüdaksüner. Tenla agütsünertemi pei alidak Ao Baptist Arogo sannüker ajanga agütsütsü akok mesüra tsünglangen agüja aliba lenirtem den tongtepreteptsü akoktsü :

Pastor, N.Lipok Jamir (Diphupar) - 96153 70625
Mr.Toshi Longkumer, Mission Director (DABA) - 94360 03553.
Pastor, L.Panger Jamir (Unity Village) - 94360 79522

Sd/- **Supu Jamir, Convenor (94360 16389)** Sd/- **Imti Jamir, Secretary (98624 08970)**

NPP Nagaland ajanga asükhu lemsateper

Dimapur, Monupii/May 27 (TYO): NPP Nagaland State ajanga sangdong ka nung, 17 Chizami AC nung NPP Youth Wing tir, Muluvoto Cukhamu ajungbena May 26, 2021 nü par kidang Sakraba nung asüba asoshi kanga jashir, ta ashi.

Iba ama jangrabangra aliba lanur aser takotet lenir ka asüba atema temolung koremer, kechiaser par nübur aser asen lokti anitsü asoshi pa dak sempet tajung jenti liasü. Pa temang asen yutsür oaka asen molungjang nung pa teti alitsü aser pai lokti

ajanga mapang tatsüka agia shilem agirtem den jembiba mapang, tashidak wara agi tesem ajunga sünger lia asen müketa aliba tzü-mopung aser ali nem tashi tasen agütsütsü tongtipang ta metetdaksütsü asoshi iba sentong ya agir, koba agi asenok temang nunga kongshir, ta ashi.

Iba sentong ya Police Headquarter Kohima tawabangba kübok State Forest Department den lungjemer agia liasü.

Asen tamang Kibuba taochi kabu nung yutsüti aser pa tesüngmangtsü taochi agi asen temolung shiranga aliba sunepstütsü, ta sangdong ajanga ashi.

Assam Assembly speaker Daimary-i tatok meshi



Assam Assembly speaker Biswajit Daimary (File photo)

Baksa, May 27, 2021 (Agencies): BJP MLA aser Assam Assembly speaker Biswajit Daimary-i Assamese oshi nung jembidang masüba o ka jembisemba atema tatok meshidaksüogo.

Daimary-i regional channel ka nung sensaksemba mapang Marwari nung tetshidang masüba o ka jembisem aser ibaji All India Professionals' Congress (AIPC) Assam president Gauravv Somani-i

aitsü. Daimary-i Marwari nung akhüm metsübiu jembio go ta Somani-i aitsü.

"Ni mezüingmeshitsü tebilemba kecha maliasü. Ni Assamese oshi nung jembiba agi manganütsü o ji jembisem" ta Daimary-i Brihostibarnü tatok meshi.

Somani ya Assam nungi süra pai Assamese oshi, amshiyim junga meteta alitsü imlar, ta paisa ashi.

"Assam nung alir kati Assamese oshi mejembitetra aser ano Assamese nung jembiba atema tatok meshitsüsa kümra, ibaji Assamese oshi atema temeimtsü tia ka lir" ta Daimary-isa metetdaksü.

"Ni Assamese oshi agi jembiba ajanga kin kar danga mezüingmeshia lira tatok meshir. Saka ni jembiba jagi kin shinga dak timtem magütsütsüla" ta paisa ashi.

Kaziranga National Park nung shikaritem merenshitsu

Guwahati, May 27, 2021 (Agencies): Assam sorkari Kaziranga National Park (KNP) nung güntok khasetba aser shikariba khenyongi magizüksü telemetba agiogo.

Kaziranga National Park (KNP) nung tüzümsüing aser arem shiruru kümzüka ayutsü indang maparen meyipa reprangshidang Chief Minister Himanta Biswa Sarma-i shikaritem merenshitsu atema tetuyuba agütsü.

Special prosecutor ka teyari agia shikariba atema tai tonglokja aliba shikaritem merenshitsu atema pai ashi.

CM Sarma-isa principal chief conservator of forest (PCCF) dang ita shia iba maparen reprangshimtsü tetuyuba agütsü.

Paisa, forest department dang park telong nung tüzümsüing mapang shirurutem jenoktsü atema highlands

yanglutsü sentong renemtsü ashi.

Iba senden nung Agriculture Minister Atul Bora, Forest Minister Parimal Suklabaidya, Finance Minister Ajanta Neog aser Health Minister Keshab Mahanta nungertem aden.

Senden nungsa Golaghat, Nagaon, Sonitpur, Biswanath aser Karbi Anglong nungi deputy commissioners, superintendents of police aser forest o veterinary department ketdangsürtem aden.

Forest force tashi itshitsü atema Assam Forest Protection Force nem prangpong tajung aser satellite phones agütsütsüla ta CM Sarma-isa metetdaksü.

Paisa PCCF dang forest personnel nem training agütsütsü atema Mandakata Commando Training Centre den tesentaktep yanglutsü tetuyuba agütsü.

KNP nung wildlife protection

tashi itshitsü atema home department-i additional SP aser DSP mapa tasen adoktsüla aser tenaji SP Golaghat kübok inyaksü, ta CM Sarma-isa ashi.

Chief Minister-isa forest protection force nung inyakerkem yaritsü ashidang, ration allowances Rs 840 agüja aliba nungi Rs 2000 talila agütsütsü atema tetuyuba agütsü.

"Kaziranga National Park nungsa anti-poaching camps tajungba kümdaktsütsüla. Special DGP kübok KNP atema Special Task Force ka tentetsüla aser iba nung Majuli district nungi ketdangsürtem adentsüla" ta Sarma-isa metetdaksü.

Paisa PCCF dang Wildlife Health and Research Institute mapa küma tenzüksü aser local nisungtem o forest force tsüingda tesentaktep tajungba akümtsüla, ta paisa shisem.



Assam nung Darrang Police-i tanü Khataniapara yimtsüing ganja (cannabis) seret pezü ngutetba den iba dak sendakba nung Mohammad Ali (48) apuba noksa nung angur. (Darrang, May 27)

AR-i Tamenglong nung COVID-19 vaccination centre lapok

Imphal, May 27, 2021 (Agencies): Assam Rifles-i Manipur kübok Tamenglong district nung COVID-19 vaccination Centre ka lapokogo.

Iba ya 22 Sect AR/IGAR(E) kübok lapok, ta Assam Rifles-i tanü metetdaksü.

44 Assam Rifles vaccination centre dena iba mesükba centre 4 lapoka lir, ta parnokisa ashi.

"Ukhrul nung nisung asüba kanga ajema lir aser tanü tashi nung nisung 8 dang asü. Maneni, Senapati nunga nisung 7 dang asü. Nisung aika dak COVID puteter anungji home isolation

mapa tenzükogo aser mozü den oximeters lema agütsür" ta Chief Minister N Biren Singh-i Bodbarnü ashi.

"Anogo 10-15 tsüingda hill district shia nung PSA oxygen plant kaka lapoktsü. Ni hill district tem nem oxygen concentrators agütsüogo. Senapati nung ni ambulance ka agütsüogo" ta paisa ashi.

Manipur nung tang COVID-19 puteta anepalur nisung 7,243 lir aser nisung 38,325 taneptsü nguogo. Manipur nungsa nisung 730 COVID agi süogo.



Spear Corps kübok Indian Army nung Lekhapani Battalion-i May 25, 2021 nü TipongCharali, Lekhapani anasa NSCN-K züingsem ka apu. Iba nisung yagi NSCN-K atema mapa balala inyaka aru aser pa ket nungi pistol ka den injang asem ngutet.

Prem Singh Tamang-i CM inyaker küm 2 abensangogo

Gangtok, May 27, 2021 (Agencies): Sikkim Chief Minister Prem Singh Tamang-i sorkar ketdangsüa aruba sülen Brihostibarnü küm ana abensaogo.

Sikkim nungeri pa dak tamang akaba atema tanü chief minister Tamang-i pelaba metetdaksü.

"Nisung ajaki amalitepa yaritepba atema pelar aser talisa wara mapang sorkar nungita yariba atema kangasa pelar" ta paisa ashi.

Sikkim Krantimari Morcha (SKM)-i temelenshi bener

arutsü atema akokba tashi inyaksü aser noki wara mapang nübortem yaritsü, ta Chief Minister-isa ashi.

"Onoki tayongzüka aika ajurua aru saka onok teinyaktsü shitak inyaker aser wadang ajak nung terenlok süngjang tema arur" ta Tamang-isa metetdaksü.

Paisa nübortem dang state sorkari latetba COVID-19 inyakyim benshitsu aser health ketdangsürtem aser frontline workers den amalitepa yariteptsü mepishia metetdaksü.

Arunachal nung COVID-19 agi nisung 3 asü

Itanagar, May 27, 2021 (Agencies): Arunachal Pradesh nung tesüiba ghonda 24 tsüingda COVID-19 ajanga nisung 3 asü aser nisung 374 dak COVID-19 aliba putet.

Lower Dibang Valley, Tawang district aser East Siang district nung nisung kaka asü. Tang tashi nung Arunachal Pradesh nung COVID-19 ajanga nisung 107 süogo.

Sample 6609 tendangba nungi nisung 374 dak Covid19 putet, ta Arunachal Pradesh COVID-19 bulletin ajanga metetdaksü.

Tesüiba ghonda 24 tsüingda COVID-19 agi shiranger nisung

190 taneptsü nguogo. Tanü tashi nung nisung 21765 tashi taneptsü nguogo.

Arunachal Pradesh nung tang COVID-19 agi shiranger nisung 3,504 anepaludar.

Capital Complex region (Itanagar, Naharlagun, Nirjuli aser Banderdewa) nung COVID-19 agi shiranger timba lir. Iba tesem nung tang nisung 653 anepaludar aser parnok sülen Changlang (420) aser Tawang (404) lir.

Nisung aika dak COVID-19 aliba putetba agi state sorkari May 31, 2021 tashi district 9 nung complete lockdown alitsü ozüing agüja lir.



TIR YIMYIM

YIMOBILEM (EDITORIAL)

DIMAPUR ROGONÜ, MONUPII (MAY) 28, 2021

Sensaker koma yaritsü ?

Sensaker ta asüba ya yimten aser lokti nung takartemi dena kanga süoki ia jembiba ojang ka lir, kechiyong alima nung teyari tenügdaktibaji sensakertem ya lir. Ibayongjiang, alima ajaklen government nunga sensaker yaritsüba aser sensak tia agientsüba aser sensaker jenjang tajungba kümdaktsüsü asoshi küm shia senotsü sentong nung sen balaka lemküja küm piyong inyaka aotsüba sentong latetter. Aji oda, shidi süra government-i inyakba mapatem teimbaka sensakertem asoshi lir saka tesümgangtsü kaji, sensakertembo tesensakba akümer saka takertemang takarba akümer. Ano, tang ama tashidak wara tesashi agi nisungtem kechalenia moutet, kecha meinyaktet aser kinungertem rongnunga temeim mesayutetba mapang nunga, nisung ajaki kanga bangpetsa jembibaji sensakertem yaritsü indang jembir aser atangji aikati sensakertem lenmang balala nung yariba angur. Aji oda, tang ama sensakertem ayangi moutet, kechi nungi bener arua chiyongtsü ta shisabolutepba mapang government-i aser ano takartemi ta masü saka temeimertemi jangotsü mesüra senotsü teraka agi yaritepbaji sensakertem asoshi tsüngrem aru ama lir. Item ajakji sensakertem yariba aser alima nung sensak tia akoktsü asoshi inyakba mapatem lir. Iba jagi tang ama tensa ajurudang, talisa, sensakertemi yimten aser arogo nungi tekümdangtsü tajungshi o aser sarasadem dang masü saka rongsen teyari imlar. Aji oda, talisa asen lima nung nisung aikati yimten, lokti tentet aser arogotemi kechi inyaker, kechi teyari agütsür ta imlaseta jembir. Atangji, akok tashi yimten aser arogoia sensakertem nem teyari agüja inyakba angur saka aikati tenük masüng aser temulung masüba indang jembir. Ashiko, teyari agütsüaka nungdakba purtem ajak ketbo metongi alitsüa akok, ano teyarisa süaka achiajemtsü masü saka ketdangsertem anepaluba nungang temulung tagütsüba inyaka alitsüa akok. Ibayongji, asenoki mozü kidang nungdak agütsüba aser ketdangsertem yaribajibo sensaker yarir masü amai bilemer. Ajisüaka, kodang asenoki jungjunga bilemdangdir, tang ama lendong timtem mapang ketdangsertem nem nungdak osettsüset aser chiyongtsü agüja yariba teyari ajakji sensaker yarirtem nem sensakertem yaritsü asoshi yariba mapatem lir. Atangji, teyari karbo tangsa ajungtsü aser tebok asüngtsü atema yariba teyari asütsü saka karbo tang aser tarutsü nunga timtem majurutsü atema yariba teyaritem asütsü. Aji oda, tang sensakertem nem jangotsü terara lemsüba agibo sensakertem taküm nungi sensak tia magientettsü aser kodang sensaka lidir, kasa nisungsa süaka, nisungtem rongnung nisung ama meraketa melitettsü. Iba tangatetba nung sensakertem taküm aser kibong nungi sensak tia agientsütsü merangba nükjidongji alima nung lokti rongnung nisung ama meraketa lidaktsüner. Aji oda, sensakertem sensak tia nungi anitettsü asoshibo tang ama alima timtem lendong mapang mibang aser tzübang tepdangtsü atema teyari terara agütsüba masü, saka iba dak nung jagi alema oa bilema inyaktsüsü nungdaker. Tanü asen lima nung sensakertem timatamba shitakba tesemjibo tebok masungba timtem masü saka tebokbo sünga lir saka shirangdang taneptsü bushitsü makoker, kechiyong hospital bill matur. Tebokbo sünga lir saka tanurtem kaketreju tajungi meyoctetter, kechiyong private school fee matur aser government school majung; business tilaka danga inyakner saka light junga maruba agi meinyaktetter; gari ka alia ayangner saka lenmang majungba agi teyangluang matemer ta asüba sensak tesem nungi sensakertem madoktetter. Item tesemtemji rebrangteta government-i dang masü saka arogoia dena sensakertem sensak tia nungi anitetba mapatem nung temulung ano khen agütsüsü tanü tensa agi nenshir. Aji oda, tang ama Covid mapang aritepa government mozü ki yanglushia renemba ama, teti government mozü kiji sensakertem senotsü meindoki taneptsü shitak angudak tesem küma yutettsüla. Tanga takartembo private mozü kidangi aotsü, anungji government mozü ki tajungba küma renemshiba aser yangji inyakertem yariba ajakji sensakertem yariba mapa asütsü. Iba kasaji sensakertem nem angati mesüra jenjang dalang agi shitakba shisaliok agütsüba government school aser arogo mission alitsü tim. Atangji, electric light yabo takarsa tenügdakba saka sensakertema light tashi medeniang business tilateri metenzükettsü, anungji government-i pei lima nung nübertem nem light kena mesepdaksüi yokba aser highway dang masü saka alu lenmang dena gari meraksai senzütettsüa yanglutsüba ajakji sensakertem tsütsü shia temeim mapa inyakbatem asütsü. Itemji bilema government, arogo aser lokti nung lenirtemi sensak tongpang anema raratsü tim.

OLEMSABANG

FALL ARMY WORM (FAW) MESEN ANEBALUYIM

Contributed By : *Temsutola Jamir*
Block Technology Manager,
ATMA, Mokochung.
 Courtesy: ATMA Mokochung.

TEPOKTETDAK:

FAW mesen ya mezüng USA aser Argentina tesemtem nung poktet. FAW ya USA nungi South- Western Nigeria-i, January ita 2016 küm nung tonga liasü. 2017 küm tashi nungbo Central aser Western Africa linük teimba ka nung renlokadok. Africa nung tsünüsempongtsü menti aser sorghum (Jenjang) amala nung timtem agütsüba angu. Ashiba agi FAW yagi Africa nung linük 50 shi nung takoksa jenjang adokdaksü.

India nunga FAW ya 2018 May ita nung Karnataka tesem mendidong nung timtem agütsüba angu. 2018 August ita tashika nungbo Telangana, Maharashtra aser Tamil Nadu tesemtem tonga liasü. Iba-i mendi, mochitsü (sugar cane), meti aser jenjang lu nung teimtem agütsüba angu. Gujarat aser Chattisgarh tesemtem nunga 2019 küm FAW anguba report süa lir.

Mokokchung district nunga Longsa, Khensa, Chuchuyimpang, Longkhum, Mopungchuket, Longkong, Mokochung yim, Chungtiayimsen, Moayimti ama yimtem nung mendilu ayimer asoshi teraksa jenti adoktaksüba nguogo. Iba mesen-i tsük lu nunga chiyima teimtem tulu aludaktsür. Merenem-i ali nungbo, iba mesen kanga kera renloka aoer asü nung, asen district aluyimer ajak atema takoksa jenti alutsü asü nung, iba osang asenok ajak renema alitsü atema lemsateper.

FAW temetettsü kar:

FAW ya India lima nung poktetba mesen masü, saka America tesem nungi aruba mesen ka lir. FAW ya India lima aluyimer ajak atema alu ayimba wadang nung takoksa jenjang tulu adokdaksütsü ana nung lir.

FAW suyapokya taküm yongsük kangasa tatsü lir saka iba taküm tatsü ka aliba mapang pa soyabokyaba jenjang ya kanga tesashi. Ashiba agi FAW shinü tetsü kadi ken nung 1000-2000 entsü akotsü tashi lir. Aji dang masü, FAW ya kangadang tashieta renloka meta ka nungi ka senzüba mesen lir, Iba FAW ya meta talang mela mela semteter. FAW kadi küm ka nung meta 1700 Km ayima senzüteter aser iba ama senzüba mapang pa entsü tesem balala nung koyonga senzür. Iba yongji FAW ya kanga dang lendong aketba mesen ka da ashir. Food Agriculture Organization (FAO)-i FAW ya Africa limabo Food security threat (Africa lima nung chiyongtsü ketdangsuba ren lendong tulu) ka ta shia lir.

FAW Tabutem

Tang tashi nung shisashir mongintem-i FAW mesen tapu ana jangjateta lir. Itemji-

1. Rice strain(R) - Iba tabu-i tsük, Turf grass, Bermuda grass, jenjang(millet), alfalfa aser pasture greens (aii) achir.
2. Maize strain (M) - Iba tabu-i menti, sorghum aser meti nung timtem agütsür.

FAW Koma Aचितettsü

1. FAW entsü tereprangtsü pati (bowl) mashilen amendak ama aser temero mesüra wako sentsü alir. FAW entsü ya süngotou telonglen mesüra menti tedong lanu (tou longteta adokdak) telonglen telong junga akor aser iba entsu telongtemya wako sentsü tera ama agi meyipanga alir.
2. Entsü nungi rüzükli longben temang sentsü tanen aser tekolak tanak alir. Teintet mesen anogo ishika tsüngda nung temang aut sentsü den temesüng medongleni asüka alir aser tekolak temang dang nungi tera tanakba melener. Iba longben jungjunga yintetter sülen longben tekolaklen ayakjang 'Y' mashileni ajenba ama ajenoka alir aser longben temang rangben nung dot tanak agi ajena alitsu. Temang tsünglanglen nung tanak tederok pezü-i Square ama ayak ajena alir.
3. Kodang longbenji züla (tesep akümstsü) akümstsü mapang tongdir, longben ali telongi ayir aser züla mero meroa tera temerem küma ali nung alir aser anogo ishika tsüngda nung shinü akümer.
4. Züla nungi shinü kodang jaktet dir shinü tebong aser tetsü tsüngda nung tachitsü balala alir.
5. Shinu tebong aser tetsü tashikang temaba nung telong temero alitsu. Item telong sentsü tanak agi longpanga alitsu. Shinü tebong tashikang talaklen temesung sentsü nüloka alitsu.
6. Shinü tetsü nungbo tashikang talak len temesüng nüloka malir aser tashikang temaba songjen nungji ayak temüro alitsu.

FAW-i KOMA RAKSATSÜR:

1. Longben yagi süngo tou tanen ajak okzüka achir koba ajanga tou paper ama temesüng aser tapu kümadoker aser mapang tatsüka tsüngda tou nung tapok apar.
2. Tamasa tou ka nung longben 1-2 alibaji ita 6 tsüngdanungbo longben 4-5 tashi rena aoer.
3. Mesen-i mapang tastüka tsüngda nung mendi tedong lanutem bushia rüpoka chiyimer aser tedong lanu ajak chitemtsür aser mesen mendi (cob) nunga rüpoka chiyima alir.
4. Iba mesen-i mendi stage ajak nung timtem agütsür.
5. Shinü aser mesen aongnung ang chiyima senzür aser ba arishi anogo 20-30 nü tashi alir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Gujarat nung Arogoi cyclone Tauktae agi kongshirtem yarir



Gujarat kübok Rajkot nung aliba Syro-Malabar Tenla ki noksa nung angur.

Ahmedabad, May 27, 2021 (Agencies): Hopta ka tejaklen cyclone Tauktae-i India anüolen kongshiba sülen Gujarat nung Arogo kati timtemer aika nem chiyungtsü aser tzu agütsüdar.

May 17-18 anogotem nung iba cyclone ajanga state balala nung nisung 169 asü, nisung 81 sama aser nisung 200,000 shi jenshia tesem balala nung lir.

Iba yipru ajanga ki 50,000 shi raksatsüba den külemi alu nung aonsotsü aika raksatsü, kiset shiruru jenti asü aser süngdong den light indong aika laoa liasü.

Rajkot nung aliba Syro-Malabar Arogo nung social work director, putir Thomas Mathew-i, "Tang onoki rongdak süa chiyungtsü aser tajemtsü tzu nüngdaker," ta metetdaksü.

Arogoi Gujarat state nung yipru agi tamajungba kongshiba district tem- Gir Somnath, Bhavnagar aser Amreli nung yipru agi kongshirtem yaridar.

District asemprongla ya tzyüimkümlen aliba districts lir.

Osangbener den jembidang putiri, "Ozü nüburtem tachitsü kecha mali, kechiyong yipru den tzunglu sashia aruba ajanga parnoki rizünga aliba tsük ajak samaogo," ta metetdaksü.

"Nüburtemi tzu ajemtsü atema 'bore wells' nung metaloker, iba denji külemi tzu bo peria mali. Electric light maliba agi parnoki tzu bo nungi tzu pump mesüteter," ta pai ashi.

Kibong karbo ki raksaba den külemi süngjang lu aser kiset shiruru ajak samaogo.

Iba yipru ajanga Gujarat kija nunga nisung 80 dak tema süogo. Kasa yipru ajanga Kerala, Karnataka, Goa, Maharashtra aser sorkari yimsüsüba territory ana - Lakshadweep aser Daman & Diu kongshia liasü.

"Arogo nungi team aikati tesem balala semdangogo.

Kibong karbo ki raksaba dang masü saka süngjanglijang dong jenti lao aser kiset shiruru ajak samaogo," ta putiri metetdaksü.

Tang iba tensa nung Arogo nungi team balalai kanga timtemertem jangjatsü meranger, iba sülen teyari agütsür, ta pai metetdaksü.

Iba dak alia yipru agi kongshiba tesemtem nung petrol aser diesel totzü 'black' nung ayokba agi nüburtem kanga timtemer.

Arogo nung inyakertemi kanga mejungi kongshiba kibong 15,000 nem ita ka peritsüsa chiyungtsü lema agütsüogo, ta pai metetdaksü.

Tang coronavirus anema tenokdangba balala aliba ajanga chiyungtsü bendena nüngdakbapurtem nem lemtsüba maparen nung onoki timtem ajangshidar, ta shia pai Khristantem dang timtemertem yaritsü ajungshi.

metetdaksü.

Laisa, "Ni yim tiyongtsülen shishilembadak anasa lia Fulani züngsemtemi injang khadokba ni angashi. Iba sülen onok aika jena atsük," ta metetdaksü.

"Ni ki anasa aliba agi ni kidangi asema aoba mapang nung ni ozü ki anasa COCIN (Church of Christ in Nations) nung züngsem, Istifanus Shehu khaseter lia angu. Fulani züngsemtemi 'Allahu Akbar' ta ayimdena Khristantem khaset," ta laisa metetdaksü.

Parnoki yim toktsür aoba sülen kibong pezü nung Khristan 8 khasetba onoki jangja, ta lai ashi.

Shehu dak alia arrshi Ruth Adamu (ECWA züngsem), Naomi Adamu (ECWA); Friday Danladi Riya (ECWA) Awuki Matthew (Catholic), Gospel Matthew (Catholic); PraiseGod Matthew (Catholic) aser St. Jude's Anglican Arogo nung züngsem Chinyere nunger khaset.

Osangbener den jembidang Dong yimdak ECWA Arogo nung pastor, Jonathan Kyoomnom Bala-i, aonung Khristantem amakba sülen tasüngnep 10:00 ako tashi nung ang police yim tonga aru, ta metetdaksü.

Pastor Bala-i, "Anepdang 10:00 ako nung ang sorkar ketdangser kar aru. Fulani teloki minute 40 shi yim amakba mapang nung sepai mesüra police shinga maru," ta metetdaksü.

"Yim amakba mapang nung ni security agent ka dangi phone call asü saka parnoki kecha meinyak. Taoba hopta Fulani züngsemtem yimdaki arua senzü saka security agent tem, sepaitem aser police-i parnok dang kecha mashi," ta pastor-isa metetdaksü.

"Nüburtemi joko security agencies dak tamang mekateter ta Nigeria sorkari metettsüla. Nüburtemi pei kümzüksü apusora lendong tulu adoktsü," ta paisa shisem.

ANOGO ABEN TSÜNGREM DEN

Tangloka ali nung dang tangtet

"Ne tezü aser nenok kongsangtem. Shiba kü dak lir aser ni shiba dak alir, pa jagi süngjang jenti atangtsü; kechiaser ni nungi pila-a nenoki kecha mainyaktet". Yohan 15:5

Tatishitsü agi, nai o jembitetba dak alaka temang rangben paralysed. Iba ama tia ka nung ne tembar kati ne den lia nüngdak ajak nung yaritsü mulungtet, na koda pelatsü. Khünü ner kidangi ainer ka na ajurui aru, aser na yarisang dang temulung achiba nai ainer dang koma sayutsü? Nai yipden nungi saker na yairsang ponger senzütsü asü? Tamakoktsü! Saka nai ne tembarsang jar, ni khen yipden nungi mesoang, pillow ka inokjang aser tzu marok ka agüjang ta ashitsü akok.

Aineri kodang na ne tembari na yariba ngudir, ne tembar ajungba angutsü aser pa asangtsü. Yisu-i ashi, ni nungi pila-a nenoki kecha meinyaktet. Paralysed nisungi tembarsang nüngdakba ama, asenok ajaki Yisu nüngdaker. Yisu nungi pilar asenoki kecha meinyaktet, asenok sasa tanela süngjang atangtsü makok. Koba kongsang tezü nung tangloka alir aser süngjang atanger yamaji Yisu dak tangloka ali nung dang asen taküm nung süngjang atangtsü akok.

Sarasadem

Temem Oba, ni Ne dak tangloker süngjang atanger taküm ka südakjangma. Amen

ABAM-i pelaba lemsateper



May 26, 2021 nü Impur Christian Hospital nung ABAM Executive Secretary, Rev. Dr. Mar Pongener, departmental secretary aser ICH tem staff senteper Oxygen Concentrator 10 meshiteta sarasademba sülen tangokba noksa nung angur.

Impur (Mokokchung), May 27 (TYO): Ao Baptist Arogo Mungdang (ABAM) aser Board of Trustees (BOT), Impur Christian Hospital (ICH) Impur ajanga Delhi Ao Baptist Arogo Trust aser Ao Naga Choir dang Oxygen Concentrator ter (10) Impur Christian Hospital nem tenla agütsüba asoshi kangasa pelaba lemsateper, ta ABAM Executive Secretary, Rev. Dr. Mar Pongener aser Chairman, Board of Trustees Impur Christian Hospital, Dr. Sashimeren Aier nati sangdong ka ajanga metetdaksü.

"Tanü asen tentak nung Covid-19 wara kanga züina

aoba mapang ka nung iba senti aser nüngdakba oset agütsüba ya Impur Christian Hospital asoshi tongshi tulu ka lir. Hospital nung item oset amshia manemertem anepaludang shirangertem aika taneptsü angutsü, ta Tsüngrem dak tamang ayur," ta sangdong nung shia lir.

May 26, 2021 anogo item Oxygen Concentrator ter nüburtem yaritsü asoshi Rev. Dr. Mar Pongener, Executive Secretary, departmental secretary aser ICH staff sentepa meshiteta sarasadema liasü; Tsüngremi tetenlartem moajangma, ta kasa sangdong ajanga lemsateper.

Plateau State, Nigeria nung Fulani teloki Khristan 37 tepset

JOS, Nigeria, May 26 (Agencies): Amongnü (May 23, 2021) Fulani telungpurtemi Plateau State kübok Jos anasa Khristan 8 tepset aser ano yimsüing ka nung Khristan 8 tepsetogo, ta osang ka ajanga metetdaksü.

Aonung 11:00 ako meta Fulani teloki Jos anasa Riyom County amak, ta iba tesem nungji alir aser Khristan temeden atema inyaker, Solomon Mandiks-i metetdaksü.

"Yimdak tanur densema Khristan 14 tepset. Kibong ka nungbo züngsem tiprongla tepset. Iba dak alia kasa yim nungisa Khristan trok tepset," ta pai metetdaksü.

Iba jakdang Dong yimdak nunga aonung 8:00 ako meta Fulani teloki Khristan 8 tepseta liasü.

Evangelical Church Winning All (ECWA) Arogo nung züngsem, Asabe Samuel-i, yimdaklirtem joko mejangtsü lia Fulani teloki yim amak, ta

OLONG PAITEP # 5825

1		2		3		4	5			
				6						7
		8								
9				10		11				
			12						13	
						14				
16						17				

TIPILEN		LANGTSÜNGLEN	
1. Nisung jenti - (5)		1. Tenük telong - (9)	
4. Tsük rudenba - (5)		2. Committee dang ajar - (5)	
6. Temzüng tesashi - (5)		3. Yagi ki okdoker - (7)	
8. S _ _ _ i - (3)		5. Yim lenmang - (5)	
9. Nisung telemsa - (3)		7. Temoatsü keter meyipa aruba - (9)	
10. Anogoshi - (4)		11. Kanga junga menemba - (7)	
12. Ajanga aor - (4)		12. Majinü - (5)	
13. Tsük rizüngdak - (3)		13. Tzuma nung senzüba - (5)	
14. Tebang nungi adokba - (3)			
16. Süngdong tatembangtiba - (5)			
17. Meputep - (5)			

OLONG PAITEP # 5824 TELANGZÜBA

TIPILEN :	LANGTSÜNGLEN :
2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.	1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.



ALOKBA DOCTOR DANGI COVID-19 MOZÜ TAJUNGTIBA KA MESH-I AO

Alokba : Ohooooiii...Doctor Saheb-ba.... Imlibilema obala nem Corona ahaba wara yagi matongtsüba mozü tajungtiba ka agüjangjo....??? Onok ama tantsür-tambur tashi mait-ji yakta menatsü tsübur ako.

Doctor : Ena ...Oba mozü ajak dang tajungtibaji 'Lisu' (Rusi) ya-a hiiiiii.....

Alokba : Waaammaa...!!! Doctor-ba mozü meshi nung 'Lisu' (Rusi) ya kechi asütsüba agütsür...!!!??? Na ya kechi sayatenyar...??? Yia matar-bo masü sudi...!!!???

Doctor : Hau-ja....Lisu (Rusi)-ji bener oang aser ner kidang alir ajak sendakteper tongshi ka nung alenloker...Kongia moi kidang dang kazüang...Nai anir ner kinunger ajak 'Azü tepen malang amai' kidang mamen senzür-a ta ner Colony-pur ajaki ajeptoka jembitsüdar-ko..... COVID - 19 tashitak memenatsü mozü tajungtibaji ajia nooo.

Lilir : L.Kika Pongener.

TANÜBO NAI LANGZÜANG

Q. HyperVerge indang headquarters kong lir ?
 A.USA B.UK C.Japan D.Russia

_____ (Taruba adok nung onoki langzüsü)

YASHI ADOK TELANGZÜBA : Odisha

AO OSHI ANGAZÜKDAK:
TANÜ ANGAZÜKTSÜBA OJANG

Jara
 (n) au aser ani agi ki tiplen tongdangtsü atakba oset (wall)
 * Au aser ani **jara** agi ki topur kanga jungdaksür.

Jara
 (v) tuluba aküm (enlarge)
 * Kü tetsüng nung adokba komo **jara** ao.

Jara
 (v) arung ta shira (if called)
 Pai **jara** ni aotsü.



Tepela Tasoba Anogo

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.



1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :

SUDOKU # 5868 TELANGZUBA # 5867

			5	7	6	9	1		5	8	4	1	2	7	3	9	6
	7		9		4	3	2	5	2	7	9	8	3	6	4	5	1
5	8	9	2	1					1	3	6	9	4	5	2	7	8
2		7	6	5		1		9	6	2	3	7	5	9	8	1	4
					9	2		7	8	4	7	6	1	3	5	2	9
9	1		7			8		6	9	1	5	2	8	4	6	3	7
			8		1		7	3	3	9	8	4	7	2	1	6	5
	6								4	6	2	5	9	1	7	8	3
8	2			6	7	5			7	5	1	3	6	8	9	4	2

OJANG LUTEP # 5411

JIDNÜKONG :

AKSMERAI :

RASE :

AELNIBEM :

MAARE :

RANMEGA :

AKEINYRI :

GDAN :

AÜNLIZG :

TERTONGTE :

OJANG LUTEP TELANGZÜBA # 5410

LENDONG MAPANG NUNG DANG KINUNGER ADIANU ASER TSÜNGREM BILEMTETBAJI AYATAI

TAN HOPTA ATEMA - KOMA SÜLA ?

Q. Tenla ki shibangtsüba masü lokti sentep malitsü ashiba dang, anungji asenok arogo shia nung lokti sentep mali tashi tenla ki azünga metoktsüi nisung ishishi lemsar kena manen sarasademba yinzü, Chain of Prayer, sentong tenzük nunga koma süla ?

PM Modi-i senden ayonga Cyclone Yaas agi teraksatsüba asadang



Nadia, May 27, 2021: Cyclone 'Yaas' ajanga Nadia district kubok Santipur nung süngdong ka laoa aliba aser ki ka raksaa aliba noksa nung angur.

New Delhi, Monupii/May 27 (Agencies): Brihostibarnü Ato kilonser, Narendra Modi-i senden ka ayongzüka Cyclone Yaas agi teraksatsüba asadangogo, ta Prime Minister's Office (PMO) sangdong ka ajanga metetdaksü.

Senden nung pai Central aser states agencies dang yipru agi kongshiba tesemtem nung teraksatsübatem tekaraba nung yanglushitsü metetdaksü.

Senden nung ketdangsertemi cyclone atema jelia renemba osang den külemi iba yipru agi teraksatsübatem osang tejangja metetdaksü, ta PMO sangdong ajanga metetdaksü.

Hokolbarnü Ato kilonseri Odisha aser West Bengal nata semdanga review senden amentsü aser yipru agi teraksatsüba asadangtsü. Paisa tayimtsü nungi state ana nungji yipru agi kongshiba tesemtem reprangdangtsü.

Bodhbarnü Cyclone Yaas agi India anüdoklen tziyimkümlen kongshiba mapang nung nisung pezü asü aser West Bengal, Odisha den Jharkhand state tem nung nisung lakh 21 dak tema aienshidaktsür shelters nung jenokdakja liasü.

Senden nung ketdangsertemi, West Bengal aser Odisha naprongla nung National Disaster Response Force team lir trokrok (46) lemzüka liasü aser parnoki nisung 1,000 dak tema kümzüka den külemi yipru agi laoba süngdong aser light indong 2,500 dak tema merükteta liasü, ta PMO sangdong ajanga metetdaksü.

Army aser Coast Guard sepaitemia tziümsüng lendong nungi nisung aika kümzük, aser kümzüka maparen inyaktsü atema Navy aser Air Force sepaitema renema liasü.

Senden tembangba sülen

Ato kilonseri Modi-i twitter ajanga, "Cyclone Yaas süiba sülen tensa asadangogo. Terenemshiba jenjang, kümzüka maparen aser relief agütsüba osang ajak metetpelaogo," ta metetdaksü.

Senden nung Ato kilonseri central aser states agency temi cyclone lendong nungi kümzüksü atema tongti shilem agia inyakba atema tenüngsang agütsüba den külemi cyclone agi kongshiba tesemtem nung yanglushitsü aser nüburtem nem teyari agütsütsü metetdaksü, ta PMO sangdong nung shia lir.

Iba senden nung Principal secretary to PM, cabinet secretary, home secretary, secretary Power, telecom secretary aser India Meteorological Department (IMD) DG den tongti ketdangsertem aika aden.

Covid wave tasembuba mapang tanurtem kümzüksü atema renemer

New Delhi, May 27 (Agencies): State aika nung Coronavirus wave tanabuba tongbang maneni raraba mapang nung ano maneni coronavirus wave tasembuba arutsü, ta bilema state aikati tanurtem iba tashidak nungi kümzüksü atema renemdar.

State aikati hospital tem nung paediatric yipten renemba nungi tenzüker arrshi küm 12 ser tekübok tanur alir tsüraburtem vaccine agidaktsütsü atema inyakba den külemi oxygen plants aser testing labs tali

amenokdar. Tawa Uttar Pradesh sorkari arrshi küm 12 ser tekübok tanur alir tsüraburtem nem vaccine agütsütsü ta sangdong aser Goa state sorkaria arrshi küm 2 ser tekübok kinü tanur alir tetsütem nem vaccine agütsütsü lemtetogo.

State aikati paediatric Covid care atema renemer, item rongnung paediatric intensive care units (PICU), neonatal intensive care units (NICU) aser sick newborn care units (SNCU) densema lir.

Uttarakhand nung DRDO-i hospital tasen ana amenokdar aser coronavirus agi shiranger tanur tetsütem anepalutsü atema facilities agütsütsü.

West Bengal aser Tamil Nadu na nung paediatric treatment inyakyim latetogo aser state aikati tanurtem kümzüksü atema task force tentetogo.

Tawa Jharkhand sorkari tanurtem iba wara nungi kümzüksü atema Delhi aser Bengaluru na nung mongintem den shisa lemsatetogo.



New Delhi, May 27, 2021: Brihostibarnü New Delhi nung Congress lenir Rahul Gandhi leniba nung party lenirtemi India nung mezüngbuba Ato kilonser, Jawaharlal Nehru asüba anogomong nung asür nem akhüm agütsütsü atema Nehru memorial Shanti Van-i aruba noksa nung angur.

EAM, Jaishankar-i US ketdangsertem den senden aika amentsü

New Delhi, May 27 (Agencies): India External Affairs Minister, S Jaishankar tang Washington D.C nung lir; pai anogo asemnü US semdangba mapang nung Joe Biden administration nung tongti ketdangsertem den senden aika amentsü.

Jaishankar-i US sorkar akümba sülen mezüngbuba anogo 100 tsünga India aser US na tesendaktep reprangshitsü aser US Tir, Joe Biden mezüngbuba kümük nung maneni tesendaktep tajungba akümtsü atema jembitsü.

Washington nung Jaishankar-i US Secretary of State, Tony Blinken, Defense Secretary Lloyd Austin aser National Security Advisor, Jake Sullivan nunger densema tongtibang ketdangsertem aika ajurua senden amentsü.

Osangbenertem senden ka nung Pentagon Press Secretary, John Kirby-i, "Hokolbarnü (defense) secretary-i India Minister of External Affairs, Jaishankar den senden amentsü," ta metetdaksü.

Kirby-isa, "Secretary-i external affairs minister ajurutsü aser taküm March ita New

Delhi nung senden amendang jembiba onüktem nung ano maneni o lemteptsü. Senden nung linük ana tsünga defence aser security tesendaktep atema jembitsü. Pentagon nung pa agizüktsü aser ken o junga jembitsü onoki yongyar," ta metetdaksü.

Tan hopta tetenzüklen US State Department nungi otongdar kati, "Secretary (of state)-i Minister Jaishankar den senden amentsü, aser senden nung COVID-19 relief, Quad ajanga India-Pacific onük nung amalitep, UN nung amalitep, regional security aser rongsenkettsüng densema tongtibang onük aika nung o lemteptsü," ta metetdakja liasü.

Jaishankar ya 2013 küm December ita nungi 2015 küm January ita tashi Indian Ambassador to the US inyaka liasü. Jaishankar-isa America nung yimtenren lenirtem aika ajurutsü.

Congress züngsem aser India Caucus nung Co-Chair, Brad Sherman aser India Ambassador to the US, Taranjit Singh Sandhu na densema lenir aikati Bodhbar aonung Jaishankar ajurua liasü.

India nung Covid agi anonisung 3,847 süogo



New Delhi, May 27, 2021: Anogo shia Delhi nung coronavirus tashidak agi nisung aika asüba agi New Delhi nung ITO anasa aliba leper nung tasü mang aremstsü jaka maliba noksa nung angur.

New Delhi, May 27 (Agencies): India nung ano nisung 2,11,298 dak coronavirus putetba sülen linük nung coronavirus case ajak agibo 2,73,69,093 jungogo aser linük nung iba tashidak agi shiranger shilem 90 anepogo, ta Brihostibarnü Union Health Ministry-i metetdaksü.

Tesüiba ghonda 24 tsünga India nung ano coronavirus tashidak agi nisung 3,847 süogo, aser linük nung iba tashidak agi asür ajak agibo 3,15,235 jungogo.

Bodhbar nü Covid samples 21,57,857 tendangogo aser tang tashi nungbo samples ajak agi 33,69,69,353 tendangogo.

Tang linük nung coronavirus agi teshirangdakpur 24,19,907 dang kümogo, aser ibaji coronavirus caseload nungi shilem 8.84 dang lir.

Linük nung coronavirus agi shiranger shilem 90.01 (nisung 2,46,33,951) anepogo aser iba

tashidak agi asür shilem 1.15 lir, ta Health Ministry-i metetdaksü.

Taküm May 4 nü India nung coronavirus case crore 2 ajung.

Ano tanga osang ka nung, Brihostibarnü Union health ministry-i, India nung coronavirus wave tanabuba süngjemdar, aser wara anema tenokdangbatem aika agienyonga iba wara süngjemtsü, ta metetdaksü.

New Delhi nung osangbenertem senden ka nung Centre sorkari, tesüiba anogo 20 tashi linük nung coronavirus case tajemba-tajemba kümдар, ta metetdaksü.

Health Ministry-isa, "Taoba hopta nungi tenzüka state 24 nung coronavirus agi teshirangdakpur tajemb akümer. Covid samples timba-timba tendangdar saka tesüiba hopta asem tashi covid case tajemba puteter," ta metetdaksü.

Coronavirus poktetba tanaben bushiang: Biden

White House, Monupii/May 27 (Agencies): United States Tir, Joe Biden-i US itdangiter teloktem dang coronavirus ya shiruru nungi menaba asü China nung aliba research laboratory nungi tenzükar tanaben kaktetshitsü totuyuba agütsüogo, koba atema Beijing nungi aitsüba ola adoktsü.

Bodhbarnü sangdong ka nung Biden-i ashiba agi, US itdangiter temi iba tashidak wara poktetba ya lenmang ana nung tenük yoka lir, saka tatem kati maruteti lir.

Tang asadanga nung tatem kati arutsü temolung moluteter, ta ashi.

Iba yongji US itdangiter dang tatem kati arutsü atema osangtem bendena anasü agi tali meranga inyaker anogo 90 tsüingta nung künem osang agüjang, ta Biden-i ashi.

"Iba report nung shilem ka ama tarutsü nung bushisüngdangba mapang nungdaksüba indanga asüngdangogo, aser yangji China dang asüngdangtsü kar dena lir," ta US tiri ashi.

World Health Organization (WHO) ajanga bushisüngdangba ka March ita tatemlen sangdongba nung, iba virus ya lah dak nungi danga shiruru ka ajanga nisung dak menalok südi aser lab nungi adokba yabo khenyongi masütsü, ta shia liasü.

Saka WHO bushisüngdangba temi Wuhan, China nung bushisüngdangba mapang parnok nem lenmang sadema yutsüba mesüra Wuhan Institute of Virology nung research agirtem shirangba atema tasüngdangba nung telangzüba monguteti lir.

Linük 14-i WHO osang nung temolung masür, aser menuba den data peria mali, ta ashir, aser WHO tekolakbaia

laboratory nungi temai adokba indang maneni bushisüngdangtsü ashi. China-i item temolung malem taitsubatem magizüker.

United States nung aliba China indang embassy ajanga Biden sentong ya aitsü aser iba maparen nung yimtenren densemba ajanga coronavirus poktetba indang bushisüngdangba maparen nung tetsükdaktsü ajurutsü, ta Brehostibarnü ashi.

Alima ajanga nung mezüing putetba COVID-19 cases ajanga kanga junga shisadangtsü aser alima ajanga nung miimshia lapokba biological laboratory tem kanga junga bushisüngdangtsü atema China-i busema lir, ta embassy odongtari ashi.

COVID-19 cases mezüingbuba putettsü ita ka shi lia Wuhan virology laboratory nung research agirtem kangasa mejungi shirang, ta osangtem aliba US itdangiter temi asadanga arur.

Saka virus ya lab nungi poktet ta kuli monguteti lir, ta US sorkari hopta tetenzüklen shia liasü.

Wuhan Institute of Virology nung research agir asem 2019 küm November ita kanga mejungi shiranga mozüki nung anepalu, ta taoba Tir Donald Trump indang administration mapang US itdangiter temi ajanga osang ka prokshia liasü, koba tang tashi iba osang tejangjabo temai madoki lir.

Ajisüaka research agirtem ya mozüki nung anir oa anepalu asü masü, mesüra parnok koba yimya nung shirang, item kuli mejangjateti lir.

Saka China foreign ministry indang odongtar Zhao Lijian-i item osang ya khenyongi tiaüzü lir, ta Hombarnü ashi.



Tulua, Colombia nung sorkar anema longkak aitertemi court ka nung mi senloksüba sülen iba ki telung nung jara nung kangki ka iloka aliba noksa nung angur. Public services, totzü, taa aser pension nung saru temloksü asoshi sorkari sentong yangluba ajanga Colombia nung hopta aika sorkar anema longkak aiter.

Pakistan nung arishi küm 18 ajunger ajak kibong kumdaktsütsü onük benok

Islamabad, Monupii/May 27 (Agencies): Lokti nung mapa tamajung inyakba, tanur dak tashiyim agi shi nung medemba aser mapa tamajung inyakba azüoktsü mechi Sindh provincial assembly nung Pakistan nung ozüing yanglur kati arishi küm 18 ajungba nisung ajak kibong kumdaktsütsü meranga draft bill ka Bodhbarnü benok.

Muttahida Majlis-e-Amal (MMA) MPA Syed Abdul Rasheed ajanga draft "The Sindh Compulsory Marriage Act, 2021" ya Sindh Assembly Secretariat nung benok, kong tanur arishi küm 18 junger kibong makum alir kechiba menua kibong makum, iba kuli

tejangja District indang Deputy Commissioner nem agütsütsüla, ta shia lir.

Tsürabur shirnoki iba kuli magütsür, tenaprong (tetsü o tebu) dang senchi sen 500 achitsü, ta Assembly Secretariat nung benoka aliba bill nung shia lir.

Iba bill ya agizükra ozüing kumra, nüburtem dangi tesunep arutsü, ta Rasheed-i ashi.

Assembly Secretariat nung iba draft bill ya agütsüba sülen, lokti nung mapa tamajung inyakba, tanur dak tashiyim agi shi nung medemba aser mapa tamajung inyakba mapatem linük nung tali akumer, ta Rasheed-i video nung sangdong ka agütsü.

"Item ajanga azüoktsü atema... Muslim nung tebur aser tetsür tem nem arishi küm 18 junger kibong akumtsü temeden agütsütsü aser yamaji inyaksü atema pei tsürabur khuret asütsü," ta Rasheed-i ashi.

Iba bill ya ozüing kuma agizükra, province nung lanurtem atema terenlok, tepela aser tajung asoshi lenmang lapoktsütsü, ta pai ashi.

Province nung lanurtem atema terenlok, tepela aser tajung asoshi lenmang lapoktsütsü mechi treasury aser opposition nung alir Sindh Assembly züingsem ajungai yaria iba bill ya agizüktsü imlar, ta Rasheed-isa ashi.

Atsüngdoker aliba Mali tir aser ato kilonser chiokogo

Bamako, Monupii/May 27 (Agencies): Khen atema shimteta alisang Tir Bah Ndaw aser Ato Kilonser Moctar Ouane na Mali mitkartemi pur anogo asem lir chiokogo, aser tena indag tashi agientsüogo.

Hombarnü Mali cabinet melentepba nung mitkar lenir ana indokba sülen ghonda ishika lir tena ya apu, koba mitkartemi Tir Ibrahim Boubacar Keita atsüngdoker ita tuko lir ataloker alitsü.

2020 küm August ita mitkar tashi amshia sorkar atsüngdokerba nung lenir aser khen atema Vice President inyaka alisang Assimi Goita den yariteper kati Ndaw aser Ouane na mapa nungi anenogo, ta Bodhbarnü ashi.

"Khen atema inyaka alisang tir aser ato kilonser na yasüing 1:30 ako (par mapang) meta chiokogo," ta mitkar lenir kati Brehostibarnü osangbener

dang ashi. "Onoki jembiba ama shidak inyakogo," ta pai ashi. Tena chiokba osang ya kinungertemia osangbener dang ashi.

Ndaw aser Ouane den Defence Minister Souleymane Doucoure nung ya Bamako tezülen Kati nung mitkar amenoka alidak yua liasü. Doucoure ya chiok asü mechiokar ano mejangja.

Taoba mapang iba linük yimsü süa aliba linük, France aser danga linüktemi ajungshiba ama United Nations Security Council ajungben senden ka Bodhbarnü mena tekeratiba nung ketdangsür ajunga talenba kecha makai chioktsü akhang aser civilian-i anir sorkar melezüksü ajungshia liasü.

Saka züingsem 15 aliba tentet yagi tenokdangba agütsütsü atemabo mejembi aser lenirtem apuba ya

mitkartemi tashiyim amshia sorkar atsüngdokerba ta mesangdong.

Ajisüaka France Tir Emmanuel Macron-ibo lenir ana apuba ya mitkartemi sorkar atsüngdokerba maparen ka lir, ta ashi.

France, United States aser regional bloc ECOWAS temi tenokdangba agütsütsü amokmeren aser US-i Malian sepai nem teyari agütsüba anena lir.

Taoba mapang sepai alisang Ndaw aser Ouane na ya taoba küm August ita mitkartemi sorkar atsüngdokerba sülen September ita shimteta liasü, aser region nung aliba linüktemi tenokdangba balala agütsütsü amokmerenba sülen transitional government ka nem tashi amoktsütsü molungtep.

Civilian temi yimsü asütsü atema ita 18 tsüingta tashi melenzüktsüba maparen

ketdangtsütsü asoshi caretaker administration nem nungloksü. Sorkar atsüngdokerba mapang tongti shilem agir Sadio Camara aser Colonel Modibo Kone na nem defence aser security mapa agüja liasü.

Hombarnü cabinet melenshiba mapang Camara aser Kone na melen, ajisüaka mitkartemi tongtipang portfolio karbo bena liasü.

Cabinet tasenba nung Camara aser Kone na medendaktsüba atem kuli kecha magütsü, saka khen atema tenteta aliba sorkar ya mitkartemi amokbanga lir aser taruba küm election agitsüsa maparen kecha melenshia meinyaktetsü, ta civil society telok balalai tamang makateti jembiba mapang iba tensa ya ajuru.

Cabinet tasenba atema Ndaw aser Ouane nati küden

atsüngdangya mesüi transitional charter nung aibelen, ta Goita-i Mongulbarnü ashi aser taruba küm transition mapang tatem election agitsü sentong aliba ama inyaksü, ta nangzük.

Mali nung 2012 küm linük north tsütsü sorkar anema nüburtemi longkak ait tenzüka linük tiyong aser kidanger linük, Niger aser Burkina Faso tashi oa mepetmesü nung lia arur. Telungpur aser sorkar meyong sepaitem tsüingta raraba mapang nisung meyerijang aika tepsetogo aser ano meyerijang aika pei ki yutsür tesem balala nung jenoka lir.

Alima nung sensaktiba linüktem rongnung Mali ya ka lir, aser yangi sepaitem hadir tajung mali aser training junga magi lir. Parnok ya UN aser France sepaitemi yarir aser ano Sahel region nungia linük pezüi yarir.

In your life you touched so many,
 In your death many lives were touched,
 You will always be in our hearts,
 Because in there you are still alive.



Late Maong Imchen (Nokpu)
 Asü : 23-05-2021

Mulungnen O

Onok molung toka alisang Asür Maongtemjen Imchen, Dobashi (Nokpu) taneptsü bushia hospital balala nung anüpaludang nungi tasü nü tashi, kija aser lokti balalai sarasadem, rongsen, shisatsü aser nübo agi molungsoa yariba asoshi kanga pelaba metedaktsür. Talisa tekupoklen agüjaa alirtem dang maneni tepelaba shisemer:

- 1) Dr Roukuolhoulie & staff of Faith Hospital, Dimapur
- 2) Dr Asang Longchar & staff of Eden Hospital, Dimapur
- 3) Dr & Mrs Merang Longkumer, Zion Hospital, Dimapur
- 4) Pastor Imtiakum & Pastor Imnatoshi Longkumer, DABA
- 5) Shri Temjen Imna Along, Minister of HE & Tribal Affairs, Nagaland
- 6) Shri Rajesh Sundararajan, the Deputy Commissioner, Dimapur
- 7) Shri Albert Ezung, SDO, Dimapur
- 8) Shri Bendang Longkumer EAC, Dimapur
- 9) The SDO & staff, Kuhuboto
- 10) Shri Temsu, Head Dobashi & Members, Dimapur District Dobashi Association
- 11) The President & Members, All Nagaland Dobashi Association.
- 12) Kevijau Village Council, Dimapur
- 13) Dimapur Nokpu Senso Telongjem
- 14) Dimapur Nokpu Tamang Telongjem
- 15) Anük-apang, Medemer, Kiyonger aser Kinungertem

Nenek ajak teyanglusang Tsüngremi moajangma.

Temeim, Jabaso, Jalatem, Semchirtem, Kinungtsü aser Kinungertem.

Changtongya nung training sentong ka ayongzüka agi

Dimapur, Monupii/May 27 (TYO): Agriculture Technology Management Agency (ATMA) Changtongya Block-i ayongzüka May 25 nü Changtongya yimtsüing nung Fall Army Worm koda jangjatsü aser azüoktsü, iba indang training ka agüja liasü. Iba training sentong nung shisalen agütsürji Assistant Technology Manager, Tuli Block Shilu Jamir liasü.

Iba sentong ya Lanutemsu'er alu nung agia liasü. Training agütsüba mapang Shilu-i, iba shiruru indang life cycle aser süngotu nung kozüka tokja aliba entsü koda jangjatsü aser tsünisenpongtsü meraksatsü tsüngda koda jangjaa azüoktsü iba indang tangazükba agütsü.

Paisa, aluyimertemi koda entsü teka agi agizükttetsü, monü/songolio rongtokba aser ai atsütokba amala teka agi inyaktetsü aliba maparentem dak rangloker jemi. Mesen aser shiruru tilateri azüoktsü atema pesticide amshiba dak sendakba nung shisalen agütsüri, neem tejang nungi agizükba kernel extract amala biopesticides ajanga shirurutem kanga takok ngua azüokteter, ta ashi.

Iba training sentong nung aluyimer teri shilem agia liasü. Sentong tatemi Neem Seed Kernel Extract aser biopesticide Miveley aluyimertem nem lemja liasü.

TEPELA LEMSATEPER

Asür P Aomeren (Yaongyimsen), 25th May 2021 nü alima nungi taküm tangola temadokdang, kwikati tamang sarasadem, nübu, shisatsü aser rongsen agi yariogo, nenok ajak den pelaba lemsateper. Talisa Zion Hospital Doctors, Nurses, Nagamese Baptist Church Kacharigaon, Tribal Old Age Home Day Care Centre, Indisen Village dang pelaba shisemer. Teyanglur Tsüngremi talidang nenok ajak moajangma.



Kohima Forest Division-i online tetoktepba ayongzüker

Dimapur, Monupii/May 27 (TYO): Directorate of School Education-i sangdong ka ajanga Kohima Forest Division-i, World Environment Day 2021 anogo Online tetoktepba ka ayongzükerba metedaktsüogo. School tanurtem aser nüburtem nem tzi mopung wazüka ayutsü koda tongtibang, iba indang tangazükba agütsütsü nükjidong nung tetoktepba ya ayongzüker.

Tetoktepba tem rongnung:

1. Illustrations (Meme/Poster/ Cartoon/Signage):- Iba tetoktepba nung Nagaland nung aliba nüburtem aser school tanurtemi shilem agitettsü. Onük: Environmental Conservation

2. Oratorical (Max. 3 minutes video):- Iba tetoktepba nung Nagaland nung tang tezungdak aliba kaketshirtemi shilem agitettsü. Onük: Innovative ideas for conservation in Nagaland.

Tetoktepba nung shilem agitsü jangrartemi

Tetoktepbatem:

1. Poster Competition:- Classes VI nungi VIII kaketshirtem atema. Onük: Environmental Conservation.

2. Otsünü tetoktepba:- Classes IX nungi XII kaketshirtem atema. Onük: Innovations on restoration of Ecosystems in Nagaland.

Tetoktepba nung shilem agitsü jangrartemi parnok tenüing June 2 nü mesera matongdang wed2021kohima@gmail.com nung züngoksemtsüla. Takoker nem senpet aser kuli kaketsütsü.

MEJEMPITETBA TEPELA LEMSATEPER

Mamangseti onoki teti meima aliba asür **Chubala Walling** (Mekuli) tasünü mangyim nüktzü anor shisa ramar alidang tsüngrem nungi nüso balala atenshiba den tamang nüksü ain agi süngzüksüba den wadang nung rongdak nungdak jenti bener arua onok dak malangba teyari agütsüba atema mulungnen lemsateper.

Kija aser telok tenüing mezülumar anungji tsüngremi ajak dak temoatsü lidakjang ta onok tamang sarasadem.

- *Temein kinungbo, chirnurtem aser anükapangtem.*



ASO : 05.03.1953
 ASÜ : 18.05.2021



OFFICE OF THE
AO SENSO TELONGJEM DIMAPUR
 Dimapur - 797112 : Nagaland
"Telongjem aser Terenlok"

SANGDONGER

Temeim Aoyer Senso tajungtem, COVID wara agi shirangertem atema pei pei kidang nungi dang Doctor consultation agitsü atema ASTD sapang ajanga lemang ka renemtsür. Anungji tekupoklen agüja aliba Doctortem tenüing, mobile number aser parnok timing slot lemsar agüja lir, idakji mobile ajanga teyari agiang.

Doctortem shirnoki nenok taküm aser mapang tenlatsü mulongtetogo Aoyer ajaki nenok dang kanga pelar. Iba mission ajanga shiranger aika taküm kumzüksüteimla tulu akar. Anungji asenok ajaki parnok takütem wazüka yujang ta asen teyanglur Tsüngrem dang sarasademtsüdi.

Doctortem nem lemsükja aliba mapangji ajaki apayua amshidi. Doctortem pa/la mapang nungji nenoki mejempitetra SMS asü nung parnok azüngba mapang nung SMS ajanga nenok den yariteptsü. Parnok nem lemsüktsüba mapang dak alaka tanga mapang nung mejangjongtsü mepishir.

DIMAPUR AOTSÜR AOER DOCTORS CONSULTATION NUMBER TEM:

SNO	NAME	CONTACT	CONSULTATION MAPANG
1	DR MOLU OZK	9366235069	9 A.M TO 10 A.M
2	DR IMCHA	9436003252	9 A.M TO 10 A.M
3	DR AMONGLA	8731890069	9 A.M TO 10 A.M
4	DR SAKU IMCHEN	9436007827	9 A.M TO 10 A.M
5	DR NUKSHITOLA	8732894815	10 A.M TO 11 A.M
6	DR IMTIWABONG	9612288073	10 A.M TO 11 A.M
7	DR SENTI	7629033559	10 A.M TO 11 A.M
8	DR IMLIENLA	8730091522	12 NOON TO 2 P.M MON,WED AND FRIDAY
9	DR APONG LONGCHAR	8787593557	12 NOON TO 1 P.M
10	DR GANGODA	9862006186	12NOON TO 2 P.M
11	DR MERANG	6009015353	12 NOON TO 1 P.M
12	DR SASHITUBA JAMIR	9436606002	1 P.M TO 2 P.M
13	DR TEMJENPOKBA	8258017543	1 P.M TO 2 P.M
14	DR ASTUNG	9436007255	ONLY ON SUNDAY 1P.M TO 2P.M
15	DR CHUBAKUMZUK	8730066018	2 P.M TO 3 P.M
16	DR BENJUNG LEMTUR	9436002196	2 P.M TO 3 P.M
17	DR IMLIYANGER	9089894788	3 P.M TO 4 P.M
18	DR BENDANGTOSHI	8974848075	3 P.M TO 4 P.M
19	DR IMLITEMSU OZK	9436002920	3 P.M TO 4 P.M
20	DR UTINA KICHU	9920939249	12 P.M TO 1 P.M
21	DR MOLU JAMIR	9436408080	4 P.M TO 5 P.M
22	DR YANGER AIER	9612475468	4 P.M TO 5 P.M
23	DR NAROLA IMCHEN	7054848301	5 P.M TO 6 P.M
24	DR WAPANG IMCHEN	9436006255	5 P.M TO 6 P.M
25	DR YANGER AIER	9436431079	5 P.M TO 6 P.M
26	DR APONG JAMIR	9366860132	5 P.M TO 6 P.M
27	DR IMLITEMSU OZK	7085840777	7 P.M TO 8 P.M
28	DR ACHILA	9436073652	8 P.M TO 9 P.M
29	DR AKUMTOSHI	8974439288	8 P.M TO 9 P.M
30	DR SENTILA	9862697552	WHATSAPP MESSAGE AJANGA DANG
31	DR CHUBALA	9485238502	WHATSAPP MESSAGE AJANGA DANG
32	Temjenwapang	7005580422	4PM TO 5 PM

Sd- Nübur tenzüka wadang nung, Sd/-
Meren Nokpu P. Sashi Longchar
 Tir, ASTD Secretary, ASTD

Dimapur Press Club-i asükhu lemsatep

Dimapur, Monupii/May 27 (TYO): DPC züngsem aser Legal Metrology & Consumer Protection, Government of Nagaland nung Registrar mapa inyaka lia mapa nungi anen. DPC-i asür kinungertem den asükhu lemsateper aser asür tanüla tesunep nung anisüngzükdakjang ta sarasademtsüba kasa sangdong ajanga lemsatep.

Villarreal-i Europa League final nung Man United kokogo

Monupii/May 27, 2021 (Agencies): Bodhbarn aonung Europa League final nung Villarreal-i Manchester United koka takok marok ajungketogo. Asaya goal kasasa nung tembangba sülen telok ana penalty metsütep aser Villarreal-i goal 11-10 agi United madak takok nguogo.

Final asaya nung mapang apuloktsür asayaba mapang tembangba tashi nunga telok anapronglai goal kaka dang idaktsür liasü, anungji penalty metsüteptsüsa aküm. Asayatem ajak metsütemba sülen Villarreal nungi Argentina nunger goal keeper Rulli-i goal 11buba idaktsü ajisüaka United goalkeeper De Gea-i goal midaktsütet.

Iba asayamung akokba sülen Villarreal coach Unai Emery-i otsü tasen ka yanglua iba tetoktepba pezübenbuba kokogo aser United atema 2017 küm Europa League akokba sülen taküma kecha mekokteti tembangogo.

Asaya nung mezüngbuba goal ya Villarreal nungi asayar Gerard Moreno-i minute 29buba nung idaktsü ajisüaka asaya tanabuba shilem nung minute 55buba nung Edinson Cavani-i United atema goal ka idakja goal kasasa aküm.

"Iba takok ya onok nükjindong atalokba ka lir aser tang iba mapang nung club puti otsü nung züngoksemtsüsa onoki koma meranga inyak ibaji



Europa League final nung Manchester United akokba sülen Villarreal nungi asayatem takok marok bener pelatepba noksa nung angur.

bilemteter," ta goal idaktsüsang Moreno-i ashi.

"Onoki otsü tasen ka yanglunüa liasü aser onoki yangluogo. Mapang apuloktsür asayaba mapang onoki kanga junga asaya aser penalty metsütepba mapang onok fan temi onok nem teyari agütsü," ta paisa ashi.

United coach Ole Gunnar Solskjaer-i, par asayatem iba tamakok ya tarutsü nunga kanga temlung shiranga bilemtetsü, ta ashi.

"Parnoki onok atema mapa kanga tasak kümdaktsü. Ball bo onoki timba belenhi saka parnoki kanga junga

nokdangogo aser onoki goal idaktsütsüsa maongka aika meyanglutet," ta pai ashi.

United forward Rashford-ia, club-i maongka tajung ka lalugo, ta ashi.

"Ojang ka nung; asaya makokba ya kanga tezüdangtsüka," ta pai ashi.

"Ajisüaka team-i metoktsüi meranga asayatsü aser taruba season tashi taitba nung meyipa arutsü," ta pai ashi.

Villarreal pur tang mezüngbuba asayamung tongtibang final ka nung asayaa liasü aser coach Emery-i, iba asaya United-i akoktsü timla tuluba lir ta ashi, saka semi-final

pezü tashi nung tamakok anguba sülen par telok dang maneni tetsükdaktsütem tongpoka aotsü ajungshia liasü.

Asaya United puri tashi taitba asayaa tenzük saka Villarreal puri Bruno Fernandes aser Cavani na sadem sadema masayadaktsü liasü.

Asaya mezüngbuba shilem nung United atema Scott

McTominay aser Luke Shaw nati dang goal nung metsüdanga liasü aser kasa mapang nung Villarreal puria goal idaktsütsü atema maongka aikabo mongutet saka maongka ka anguba melalu.


Moreno-i final nung indaktsüba goal ya densema iba season nung goal 30 idaktsüogo aser Villarreal nungi asayatem rongnung Giuseppe Rossi den külemi season ka nung club atema goal timtiba idaktsüba asayar kümogo

Asaya tanabuba shilem nunga United puri asaya amokbanger asaya aser Cavani-i goal ka idakja goal kasasa aküm.

Mapang apuloktsür asayaba mapang Villarreal puri tajungba asaya aser Emery-i atakzükja aliba mapang matem tsüngda asayar pongprongla melener liasü, ajisüaka Solskjaer-i minute 100buba nungang mezüngbuba asayar melen.

Emery-i aniokba substitutes pongpronglai penalty idaktsü, saka penalty 11benbuba metsütepba mapang De Gea-i goal midaktsüteti United puri asaya makok.

Zinedine Zidane-i Real Madrid coach mapa toktsüogo



Monupii/May 27, 2021 (Agencies): La Liga asayamung nung Atletico Madrid ajateta metutetba sülen anogo ishika lir Zinedine Zidane-i Real Madrid manager mapa toktsüogo.

European championship 13 ben tashi bener aliba team, shirnok Champions League semi-finals nung Chelsea-i tsükdaktsü aser season 11 nung tang mezüngbuba takok marok ka danga mongutetba sülen France nunger coach yagi club toktsütsü atema telemtetba agiogo.

Italian football journalist Fabrizio Romano-i iba osang ya tweet asü aser Spanish sports outlets; Madrid sports dailies Marca aser AS na den radio station Cadena Ser-i oba osang sangdonga liasü.

Anogo 10 tejakdang Zidane-i, pa kübok asayatem dang season tembangba sülen pai club toktsütsü ta shidokogo ta osang adokba ya tai ta pai shiogo.

"Ni asayatem dang kodaser ni tang aotsü ta ashitsü? Iba ya teyazü," ta pai Athletic Bilbao goal 1-0 agi akokba asaya tembangba sülen ashi.

"Ni iba season dak rangloker lir. Asaya ka anunga lir aser onoki takokba tashi tajungtiba asayatsü merangtsü. Final nung kechi ataloker aji dang tongtibang," ta pai ashi.

Paisa, "tanungba ya season tembangba sülen jangjatsü," ta ashi. Osang tejangja süra Zidane-i tang agi tanabenbuba iba club coach mapa toktsür asütsü.

Zidane-i 2016 küm January ita mezüngbuba Real Madrid coach mapa belenzük aser pa lenisüba nung Real-i 2017 küm Liga title den Champions League akok. Iba sülena 2018 küm may 31 nü pai ajungbena mapa toktsü.

Pa 2019 küm tanaben meyipa aru aser 2020 küm La Liga asayamung tanabenbuba akok aser Spanish Super Cup dena koka liasü.

September 19 nungi IPL 2021 tenzükshitsü akok: BCCI

New Delhi, Monupii/May 27, 2021 (Agencies): Thitemer aliba Indian Premier League (IPL) 2021 asayamung ya taküm September ita United Arab Emirates nung tanaben tenzükshitsü aser iba League final October nung asayatsü akok. Iba league nung shilem agirtem dak Covid-19 positive putetba ajanga Board of Control for Cricket in India (BCCI)-i iba asayamung anenja liasü.

India Today sangdong ajanga angazükba agi, IPL 2021 ya September 19 mesüra 20 nungi tenzüktsü aser October 10 nü final asayatsü.

India aser England nungi asayatem, shirnok September 14 nü Test series asaya atemtsü, iba series temer IPL nung dena alir asayatem September 15 nü Dubai-i aotsü aser IPL metenzükdang anogo asem tashi parnok quarantine asütsü imlar.

Iba series dak sendakba nung India aser England indang cricket board tsüngda jembishinüdar, saka August ita Test series pungo atema asalentong melenshitsü mechi ECB dangi BCCI ajanga temepishiba mesüra shidi yoka mali.

"Indian cricket board-i iba series dak sendakba asalentongtem melenshitsü

asoshi ECB dang memepishitsü mesüra tezüluba ajanga-a masüngdangtsü. Asayatem September 15 nü England nungi Dubai tashi aotsü, koba bubble ka nungi bubble tanga kati aoba inyakim ka ama alitsü aser anogo asem tashi quarantine asütsü," ta India Today indang Boria Majumdar-i Sports Today dang ashi.

Caribbean Premier League (CPL) 2021, koba August 28 aser September 19, 2021 tsüngda asayatsü renem, iba asayamung atema anogo melenshi adoktsü akok, ajiasünungang iba asayamung (IPL) nung dena alir bendanger asayatem mapang shitak nung Dubai kübok IPL bio-bubble nung adentsü akok, ta Boria-i shisem.

"CPL 2021, koba August 28 nungi September 19, 2021 tashi asayatsü renemdar iba league atema anogo melenshitsü. Iba dak sendakba nung board 2 - BCCI aser Windies cricket tsüngda olemteptsü aser iba franchise yagi tongti shilem ka agütsü. Maparen süsümedema bener aotsü asoshi Trinbago Knight Riders-i iba sensaksemba nung shilem tongtibang ka agütsü. Anungji, CPL ya September 14 mesüra 15 nü tembangtsü aser match

ajunga St. Kitts nung asayatsü," ta Boria-i metetdaktsü.

"Asayatem 'The Hundred' (July 24 nungi August 21) nunga shilem agütsü aser iba sülen St. Kitts-i oa anogo 4 nungi 5 tashi quarantine asüba mapang, asayar ajak vaccine agütsü asoshi asüngdangtsü akok. Ajiasünung, September 15 nü tashi Dubai tonga arur sülen, September 16, 17 aser 18 tashi anogo 3 quarantine asütsü lenmang adoker," ta Boria-i ashi.

"IPL 2021 nung ano match 31 tashi asayatsü anünga lir asünung, iba League atema anogo 21 tashi asayatsü sentong lir. Iba League nung playoff anogo 4 masayadang 27 league game asayadoktsü. Ano külen, 9 mesüra 10 double-headers asayatsü, koba tetezü asaya 20 atema tebilemstü madoker aser anogo 7 nung match ka ka ayong ayonga asayatetsü. Ajiasünung, September 19 mesüra 20 nü iba league tenzük nung shitak asütsü aser October 10 nü tembangtsü. Tang, BCCI-i item anogo nung tanüngba IPL asayatsü asalentong yangludat. Asaya anogotem atema ni BCCI ketdangsurtem, franchise kibur, CEOs aser otongdar ajanga tongtepratepogo aser parnok ajaki iba osang jangjatsüogo," ta Boria-i ashi.

BILEMDANGANG

"Tangula sashia ali tashibo ali wadang ano metembang."